

Iz naftne bušotine u mjestu Obudovac kod Bosanskog Šamca prije godinu i po izvađene su prve količine nafte, za koju su preliminarne analize pokazale da je dobrog kvaliteta. Međutim, iz ministarstva industrije, energetike i rudarstva RS-a, kao i koncesionara, kompanije „Jadran-Naftagas“, još uvijek nema konkretnih informacija da li će, i u kojim količinama, Posavinom poteći „crno zlato“.

#### Poslovna politika

U entitetskom ministarstvu uvjeravaju da su iskustva iz ovog projekta pozitivna, ali ne preciziraju da li je naftna bušotina na ovoj lokaciji isplativa.

- Svi detalji o ovom poslu stvar su poslovne politike i o njima će se izjasniti kompanija „Jadran-Naftagas“. Ugovor koji imaju sa Vladom RS-a je aneksiran i produženi su rokovi za nastavak istraživanja, a koji idu planiranom dinamikom - stav je ministarstva industrije, energetike i rudarstva RS-a.

O detaljima nisu ovlaštene da govore ni općinske vlasti u Bosanskom Šamcu, ali tvrde da su u nezvaničnim razgovorima dobili uvjeravanja da je bušotina u Obudovcu perspektivna.

- Radovi i istraživanja u Obudovcu nisu stala, a stručne analize će pokazati da li su postojeće količine rentabilne i ekonomski isplative. Na istoj lokaciji se, uz pomoć svojevrsnih raketa, obavljaju bočna bušenja. Gotovo čitavo stoljeće se govori o nalazištima nafte i gasa na ovom mjestu, ali je pitanje da li su ta ležišta komercijalna - kazali su za Faktor Mjesnoj zajednici Obudovac.

Ključni akteri ovog posla, kompanija Jadran-Naftagas, zajednička firma NIS-a i „Njeftengazinkora“, koja ima koncesioni ugovor za istraživanje nafte na ovom lokalitetu, nisu bili raspoloženi za zvanične izjave o rezultatima do kojih su došli u proteklih godinu i po, a čitav posao je, očigledno, obavljen velom tajni.

#### Sve utihnulo

Mještani Obudovca zbog toga sve više gube nadu da će njihovim krajem poteći ova skupocjena tečnost.

Tvrde da već decenijama slušaju priče kako Posavina leži na nafti, a da, iako su i sami viđali crnu tečnost gdje izbija iz zemlje, ne vjeruju da je to dovoljno da bi se vršila masovna i planska eksploatacija i da bi rafinerija od toga imala koristi.

- Kada je u februaru 2015. godine iz naftne bušotine blizu naših kuća izvađeno 5.000 tona sirove nafte, svi smo se obradovali, jer je ovo siromašan kraj, ljudi su nezaposleni i u tome smo vidjeli nadu da cijeli kraj procvjeta. Nekoliko mjeseci pričalo se o tome, a onda je sve utihnulo. I sada neki stranci, najčešće Rusi, odu do bušotine, ali nama niko ništa ne govori. Da ima nešto vrijedno pažnje, do sada bi nas sigurno obavijestili - kazao je mještanin Obudovca Pero Komić.

### Milionske investicije

Preduzeće "Jadran-naftagas" je sa Vladom RS-a 2011. godine sklopilo Ugovor o koncesiji za istraživanje i korištenje nafte i gasa. Koncesija je dobijena na period od 28 godina - tri godine za istraživanja i 25 godina za eksplotaciju. Ugovorom se "Jadran Naftagas" obavezao da će, na osnovu usvojene Studije ekonomske opravdanosti, u istraživanja i eksplotaciju nafte i gasa na teritoriji RS-a investirati 229 miliona dolara, s tim što će planirana vrijednost investicija za istraživanje biti 40,7 miliona dolara, a za fazu eksplotacije 188,3 miliona dolara, ako se dokažu rezerve.

izvor: faktor.ba